



Sesida dals

Communitgà ils

Protocol nr.

17 d'avrigl 2023

19 d'avrigl 2023

303/2023

Dumonda Loepfe

concernent l'applicaziun dal criteri «raritad» tar la realisaziun da la CIMFS

Resposta da la Regenza

Tar la dumonda 1: Cun preoccupaziun ha la Regenza prendì enconuschienscha da la pratica da l'organ spezialisà e da l'organ da decisiun da la Cunvegna interchantunala davart la medischina fermamain spezialisada (CIMFS). Cuntrari a la definiziun da la radunanza plenara dals 14 da mars 2008 attribueschan ils dus organs adina pli savens secturs e prestaziuns cun gronds dumbers da cas a la medischina fermamain spezialisada. Uschia retiran els quests cas dal champ da cumpetenzza dals chantuns. En quest connex stoi er vegnir menziunà, che secturs da prestaziun respectivamain malsognas vegnan classificgads senza motivs medicinals en secturs parzials, e quai en divergenza da las valitaziuns da persunas spezialisadas cumprovadas. Quai ha per consequenza che l'Ospital chantunal dal Grischun ristga da betg pli pudair furnir en l'avegnir tractaments che valan oz sco spezialisads, perquai che quels vegnan classificgads da nov sco prestaziuns fermamain spezialisadas. Quai pertutga per exempel il provediment d'uffants en cas d'urgenza e probablamain er la chirurgia d'accidents spezialisada. Quai na restrenscha betg mo il spectrum da prestaziuns da l'Ospital chantunal dal Grischun, mabain tut ils ospitals en il Grischun. Per ch'il Grischun restia in ferm lieu d'ospitals cun in provediment da basa cumplessiv dovri in ospital dal center cun in vast portfolio da prestaziuns, e quai er en ils secturs spezialisads.

Tar la dumonda 2: Sur il departament cumpetent vegn la Regenza ad intervegnir tar l'organ da decisiun, per ch'il criteri «raritad» vegnia applitgà – tar l'attribuziun da secturs e da prestaziuns a la medischina fermamain spezialisada – uschia, sco quai ch'igl era vegnì garantì als chantuns en il rom da la procedura da participaziun a la

convegna. Per motivs pratics vegn questa intervenziun fatga en cooperaziun cun auters chantuns ch'èn pertutgads en medema maniera da la pratica dals organs da la CIMFS numnads qua survart. En quest connex sto probablmain vegnir messa en dumonda particularmain la constellaziun da l'organ spezialisà. Quel sa cumpona numnadain principalmain – ultra da represchentantas e represchentants da gronds ospitals da l'exteriur – da represchentantas e represchentants dals ospitals universitars e dals ospitals dals centers gronds. Persunas d'ospitals dals centers mesauns n'èn betg represchentadas en l'organ spezialisà, in fatg che po er declarar la pratica da l'organ spezialisà.

Tar la dumonda 3: Sche l'organ spezialisà e pia er l'organ da decisiun insistan sin lur pratica estensiva d'interpretar la premissa «rarità», è la Regenza pronta da considerar ina sortida da la CIMFS ed eventualmain da suttametter tala al conclus dal Cussegl grond. Per motivs pratics duai ina tala sortida avair lieu ensemen cun auters chantuns ch'èn pertutgads en medema maniera da la pratica estensiva dals dus organs. La CIMFS perda sia vigur, sch'il dumber da commembers sutpassa 17. Sche mo paucs chantuns sortan, ston ins partir dal fatg, che la CIMFS survegnia puspè cumplettaimain la cumpetenzza da decretar la glista d'ospitals. En quest cas na pon ins betg excluder, ch'il Cussegl federal vegn a proponer al Parlament federal da declarar la CIMFS sco generalmain lianta, quai sin dumonda dals chantuns interessads. Ils chantuns sortids pudessan alura far valair lur interess tar il Parlament federal en il rom da la consultaziun respectiva e da las debattas che suondan. Tge ulteriurs effects ch'ina smanatscha da sortir dal chantun Grischun u ina sortida effectiva vegnan ad avair, na po oz betg vegnir giuditgà definitivamain.



En num da la Regenza

Il president:

Peter Peyer

Il cancellier:

Daniel Spadin